

MIZORAM BAPTIST KOHHRAN

R.No. S.R.1 of 1980-81

(Registered under the Societies Act XXI of 1860)

Serkawn, Lunglei District, Mizoram - 796 691



Motto: Gospel For All

NI PAWIMAWH BU

2023 Revised Edition

**GENERAL SECRETARY
THUCHAH**

MIZORAM BAPTIST KOHHRAN

NI PAWIMAWH BU

Copyright Reserved by:

Worship Department,
Baptist Church of Mizoram,
Headquarters Office,
Serkawn, Lunglei,
Mizoram – 796 691

2023 Revised Edition

Mizoram Baptist Kohhran chuan Ni Pawimawh a neihte ̣ha taka hman a nih theih n̄n Ni Pawimawh Bu siamin a hman dân t̄r (detail programme) pawh dah ̣h̄n a ni. Assembly 2016 chuan Ni Pawimawh leh kan hman dân thlir ̣hat nise tiin a r̄l a. He thu umzuiin Ni Pawimawh Bu hi a hranpain siam ila kumtin chhut thar ngai lovin a hman dân t̄r (programme) erawh hi chu kumtin siam a sem ̣h̄n nise tih a ni.

Hun engngemaw chen kan kal dân pangaia a kan kal hnuah, Assembly-in kan Ni Pawimawh neihte paih ̣hen leh dah tharte a neih av̄ngin Ni Pawimawh Bu hi chhut thar a lo ̣ul ta a, a hman dân tur chipchiar (detail programme) erawh siam lovin, thupui chauh dahin kum tin sem ̣h̄n tur a ni.

Ni Pawimawh Bu hi Tualchhông Kohhran zawng zawngin kawl ni se, a 'Ni' a lo thlen a anihna kan hriatchian theih nân a ẵangkai hle. Tin, Fellowship leh mimal te pawhin kan hman ẵangkai thei baw ang. Mizoram Baptist Kohhran Assembly-in Ni Pawimawh a neihte hi ẵa taka hmang ẵhîn tur leh kan thupui siamte pawh ngaipawimawh tûrin kohhran hote ka ngên a che u.

Dated: 19th September 2023 **Rev. R. Lalbiakliana**
General Secretary
i/c Worship

CHHUAHTU THUHMA

Mizoram Baptist Kohhran, Worship Department chuan kum tinin Ni Pawimawh Bu leh programme a buatsaih ẵhîn a. Vawi tam tak tih dân thlâk kualin Order of Service nên lama siam châng a awm a, Thupui te pawh siam chang leh siam loh châng a awm baw ẵhîn. Kum 2016-a Ni Pawimawh Bu chhuah aẵang khân kum tinin a belh ngai lai nia hriatte belh in kum khat zêl hman atân a siam ẵhîn a.

Kan kal dân leh kalphungte chu thlâk danglam ngai nia hriat a ni a. Tûn aẵang chuan Ni Pawimawh Bu hi lehkhabu a awm reng tawh tûra buatsaih niin Ni pawimawh kan hman chhan leh a chanchin tângpui târlan a ni. Tichuan, kum tinin Ni Pawimawh programme tihchhuah a ni anga, a pheik (leaflet) zela siam tûr a ni. Bible châng, thupui, etc pawh a hun a zirin dah tûr a ni. Kum 2024 aẵanga hman ẵan tûrin buatsaih a ni.

A chung a kan tarlan ang khian kal zêl tawh tûr a nih avângin siam thât duhna, a awm a nih pawhin Worship Department Committee-ah duh dân leh thâ tih dân fiah taka târ langin thlen theih a ni. Tin, Ni Pawimawh belh leh paih chungchâng erawh Assembly thu a ni.

He Ni Pawimawh Bu buatsaih kawnga tha leh zung
sêngtute; Worship Department-a thawktu leh endik
hna min thawh saktu Team of Proof Readers-te
hnênah lâwmthu kan sawi e.

Tin, he Ni Pawimawh Bu hi kohhrante hnena a thlawna pêk a nih theihna tûra a chhutman min pêk saktu Administrative Department chungah lawmthu kan sawi bawh e.

Kohhranho ten ʔangkai taka hmang tûrin duhsakna
ka hlan a che u.

Dated: 19th September 2023 **Rev. ZD Rodingliana**
Director
Worship Department

A CHHUNGA THU AWMTE

<i>General Secretary Thuchah</i>	iii
<i>Chhuahtu Thuhma</i>	v
Kum thar Ni	1
Missionary Day	3
Phar Pual Pathianni (Leprosy Sunday)	6
Baptist World Alliance Nî	10
Missionary Thlen Champha	14
Tumkau Pathianni	17
Good Friday	20
Easter Sunday	22
Kristian Naupang Pawl Ni (KNP Day)	25
Buhfaitham Pathianni	29

Baptist Kohhran Hmeichhe Pawl Ni (BKHP Day)	33
Baptist Mipa Pawl Ni (BMP Day)	38
Kristian Chhôngkaw Ni	42
Thlarau Thianghlim Thlen Ni	44
ṬKP Ramthim Ni	47
Relief Sunday	50
Mission Sunday	52
Ṭhalai Kristian Pawl Ni (ṬKP Day)	55
NEICC Day of Prayer	61
Khawvel Sunday School Ni	65
BWA Hmeichhe Ṭawngṭai Rual Ni	69
Naupangte Ni	72
Bible Sunday	75
Krismas Ni	84

KUM THAR NI (January 1)

Kum khat chhônga ni hmasa ber January ni 1 min hruai thlengtu kan Pathian hnenah lâwmthu i sawi ang u. Kum thar hian beiseina min pe a, Lalpa duh zâwnga ke kan pên theih nân a hruaina i dil ang u.

Kum thar lâwm dân chanchin: Thuthlung Hlui lamah chuan Israel-te kum chhiarna hmasa ber chu loa thlai chîn dân indawt kalhmang zûl zuia siam a ni a. Kum thar pawh buh seng ṭan ni aṭangin an chhût ṭhîn. Amaherawhchu, Solomona lal lai khân, remchân zâwkna avângin an ṭhenawm ram Tyrian calendar kalhmang zûl zuiin calendar thar an siam chhuak a.

BC 450 vel aṭangin kum chhiar dân dang deuh an tichhuak leh a. Kum chhiar chungchâng a thuneitu ber chu puithiamte an ni. AD 70-a Jerusalem khawpui leh Temple Rom sipaiten an tihchhiat tâk hnuah khân, puithiamin kum chhiarna chungchanga an thuneihna

chu tâwpin; Juda rabbi-te kutah a awm ta a ni. Hun a lo kal zel a, Rom lal Julius Caesar (Julias Sizar) siam Julian calendar chu Rom lalram chhûngah an hmang leh a. Kum 1500 chhoah Gregorian calendar an hmang chho leh ta a ni. Julian calendar ang tho in Gregorian calendar-ah pawh January ni 1 hi kum thar ni a ni ta zel a ni.

Mizoram Kohhran ten eng hun lai aṭangin nge Kum thar Ni hi kan hman ṭan tih chhui chhuah hleih theih a ni tawh lo va. Kan Missionary hmasate kaihhruainain kum thar lâwmna hun kan lo hmang chho ve ṭan a. A tir lamah chuan tûn ang hian urhsûn takin an hmang lem lo nia hriat a ni. Tûn hnua hrawh Kohhranhoten Pathian min hruaina ropui tak avanga lâwmthu sawi nân leh, Lalpa faka chawimawi nan kan hmang a. Hmun ṭhenkhatah phei chuan thingpui ruai leh sa ruai te nêh hlim takin Lalpa châwimawina hun atan kan hmang ta zel a ni. Ni leh thla leh kum te siamtu leh neitu chu Lalpa a nih avangin, Amah hriatna nen kan hun liam tawhte kan hmang ṭha tâwk lo a nih pawhin, vawiin kum thar niah hian hun bi te siamtu Lalpa duh zawnga kan hman theih nan Kohhranhote Lalpa hnênah inhlân thar ṭheuh ang u.

MISSIONARY DAY (January 11)

Sâp Sipai Officer, Thomas Herbert Lewin (Thangliana) chuan December 25, 1871 khân a nupui Dari leh a hote nen Belkhai aṭanga mêl ruk, Tuikawi khuaah Krismas hman puiin ngaihnaawm takin Lal Isua pian thu hi a lo sawi tawh a. Kum sawmhnih a vei hnu 1891 khân, The Welsh Calvinistic Methodist Foreign Mission hnuaia Khasi Hills Missionary thawk lai Rev. William Williams pawh a thawhna hmun aṭangin Mizoramah rawn zinin Bible milemte pawh a sem ni âwma sawi a ni. Mizote chanchin a lo hriat thawi tawh avângin missionary intirh nân a ṭha dawn âwm em tih enthlithlai tûra lo kal a ni. Thla khat chauh Mizorama awm phalna pêk a ni a, a thawhna hmun panin a haw leh ta a ni.

January 11, 1894 khân kan rama missionary hmasa ber Sap Upa leh Pu Buanga-te chuan Sairang an lo thleng a. Heta tanga chhiar ṭana a kum za-na, Mizoram Gospel Centenary chu Mizoram Kohhran lian pahnih Baptist

Kohhran leh Presbyterian Kohhran bâkah kohhran dangte chuan lungual takin Mizoram pum huapin 1994 khân lawm a ni a. Kan pioneer missionary-te lo thlen champha January 11 hi kum tinin kan serh a, Pathianin min lo hruai thleng leh ta hi a lawmawm hle mai. He hun pawimawh takah hian Sap Upa leh Pu Buanga ten Mizo hnam tâna an thawh nasatzia leh Mizo hnam tâna an hnathawh hlutzia hi hun rei lo te chhûnga sawi sên pawh a ni lo vang.

Kan missionary hmatâwng (pioneer missionary) pahnihte hian Isua Krista Chanchin Ṭha min hrilh a, chhandamna kawng min kawh hmuh a, Kohhran min dinsak a. A AW B leh lehkha chhiar tûr min siamsak bakah zirna sikul min dinsakin, lehkha min zirtîr bawk a. Kan taksa, rilru leh thlarau damna rawngbâwl hna thawkin nun dân mawi leh ṭha min zirtîr a. Kan hnam hmasawmna lungphûm phumtute an ni. Ramhuai biakna leh hlauhna lak ata Lal Isua Krista Chanchin ṭha-in min chhan chhuak a, chatuana nunna min pe a. Silh leh fên mumal tak pawh la inbel nachang hre lo, saruak deuh thawa awm ṭhin kha tûnah chuan an rawngbâwlna avângin khawvêl huapa inchei dân pângngaiin kan lo inchei ve ta a.

A AW B nei lo kha India ram hmar chhak state pariat zingah zia leh chhiar thiam tamna ber kan lo ni ta reng mai. India ram zau takah pawh a berte zînga mi kan ni ta. Maurâp in chhe te tea khawsa thin Zofate

kha tunah chuan in ṭha tak tak, mawi leh nuam tak takah kan lo khawsa ve ta. Ei leh in tur tuihnai eng mah nei ngai lo khân Sap Upa leh Pu Buangate rawngbâwlna avângin ei tur tuihnai leh ṭha tak tak kan lo eiin kan lo in phâk ve ta. Mizoten tûn dinhmun kan lo thleng ta hi kan Zosapte vâng liau liau a ni. Lalpan kan missionary hmasa Sap Upa leh Pu Buanga-te hmangin thil ropui tak min tihsak avângin Pathian hnênah lâwmthu i sawi ang u.

Kan ram sawrkâr, Kohhran leh mipui zawng zawngte hian January 11, Missionary Day hi hlut nachâng hria ila, Kohhran tin ten Pathian hnena lawm thu sawia inkhâwmna hun atân i hmang theuh ang u. He hun ropui leh awmze nei takah hian a lawm nân ruai hial pawh ṭheh thei chuan ṭheh ila, kan missionary-te rawngbâwlna avânga Lalpa fak leh chawimawi nân i hmang theuh ang u. Kan sawrkâr-in chhuṭi ni atân a lo puang hi a lawmawm hle a, khawvêla Zofate kan awm chhûng chu tidanglam lovin hmang chhunzawm zêl thei ila a va lawmawm dawn êm.

He ni ropui takah hian keini anga Chanchin Ṭha malsâwmna la dawng ve lo tam takten malsawmna an lo dawn ve theihna tûrin i inhlân thar ang u. Hlim taka Missionary Day hmang theuh tûrin duhsakna kan hlân a che u.

**PHAR PUAL PATHIANNI
(LEPROSY SUNDAY)**

(January Pathianni hnuhnung ber)

Phâr pual Pathianni (Leprosy Sunday) hi kum 1943 aţangin kan Kohhran (BCM) chuan kan lo hmang tawh thîn a. Kum 1947-ah Assam Christian Council chuan a huam chhûnga Kohhrante hman tûrin Phar pual Pathianni siam a, he mi nia thawhlawm pawh chu The Leprosy Mission ţanpui nâna pek ni se tiin a rêl a. Hun rei tak chu January thla Pathianni wawi 4-naah kan hmang thîn a. Kum 2006 Assembly-in January Pathianni hnuhnung berah hman tawh tûra a rêl angin tûn thlengin kan lo hmang ta a ni.

The Leprosy Mission (TLM) Rawngbâwlina: Irish tlangval Wellesly Bailey-a chu India ramah zirtîrtu hna thawka missionary ni tûrin a inbuatsaih a. Missionary-te zuia rawngbâwla an feh chhuahnaah India rama phâr khawngaihthlak em em, enkawltu

ţha nei lova kawtthler leh an dahkhawmna hmuna awmte a hmuhin a khawngaih êm êm a. Chûng mite taksa leh thlarau chhanchhuah aia rawngbâwlina ngaih pâwimawh tûr awm bikin a ring lo va, a rilruah a riak reng a. Tichuan, kum 1874-ah Punjab ram khaw pakhat Ambala-ah harsa takin bul a lo ţan ta a ni.

Rev. KD Siamliana-te nupa chu kum 1975 July ni 1 aţang khân East Mongar, Bhutan ram-ah BCM Missionary-in Phâr damdawi inah an thawk a, chuta ţang chuan The Leprosy Mission Trust India te nen hma kan la ho ta a ni. Kum 1985 khân Mizoramah phârte tâna rawngbâwlina pawimawhzia leh fund raising lam thawk tûrin an lo chhuak a, TLM Promotional Secretary, North East India hna pek a ni. Chuta tang chuan Mizoramah TLM rawngbawlna hi kal chhohpui a lo ni ta a. Kum 2007 khân anni hi an chawlh hnuin Rev. Lalzarliana chu TLM Promotional Secretary hna chhunzawm tûrin ruat a lo ni ve leh ta a. Kum tam tak TLM Trust India (TLMTI) te nen Phâr te taksa, rilru leh thlarau chhanchhuahna kawnga hma kan lak ho hnuin May 1, 2017 aţangin TLM Trust India nena kan thawhona chu a lo tâwp ta a ni.

TLM Mizoram lo pian dân: India ram sawrkar laipui sum dinhmun thlâk kual velin TLM Mizoram te headquarters, Delhi lama sum chhunluh kawngah harsatna nasa tak min siam a. Thawhhona kawngah harsatna a lo awm tâk avângin inthathen a ngai ta tlat mai a. Chutiang harsatna avânga phârte rawngbâwlina tâwp mai tûr chu hetih hun laia TLM Promotional Secretary, Rev. Lalzarliana leh hruaitu dang te chuan rem ti lovin phâr rawngbâwlina chhunzawm leh theih dân tûr ngaihtuahin theih tâwp an chhuah a. TLM Mizoram hi Office fel taka inbunin, NEICC-ah Associate member niin, Sawrkar Society Act hnuaiah register a nih bâkah TLM chanchinbu 'The Leprosy Mission' pawh RNI nei thlap a nih avângin, nghet deuh takin a awm sa reng a. Tichuan, TLM Chapter zawng zawnga hruaitute ko khâwmin Special Meeting an ko ta a. The Leprosy Mission, Mizoram (TLMM) tih hming puin June 2017 atângin Mizorama Phârte tâna rawngbâwlina chu chhunzawm zêl tûrin thutlûkna siam a lo ni ta a.

Tichuan, tûn hmaa atanga tanpui lo beisei ve fo thîn tute, India rama Phar Colony lian ber, Andra Pradesh State, Guntur District, Bapatla-a phar enkawlina chu hma lâkna thar atân an thlang fel a. Chulai hmun

lo enkawltute, Bethany Colony Leprosy Association (BCLA)-te nen thawh hona thuthlung a siam ta a, mahni pualin hma a lo la ve thei ta a ni. Phâr 1200 vêl taksa leh thlarau mamawh ngaihtuahin an damdawi mammawh leh ei leh in tûr pêk an ni a. Hei bâkah hian Mizoram chhunga phar natna veite zawn chhuah leh enkawl a, tisa leh thlarauva chhanchhuah leh chhawmdâwl hna thawh a ni ta bawk.

Hetianga TLM Mizoramin hma an han lâk chhoh tâk hnu hian BCM pawhin hun kal zel tûra thawhhona tha zâwk leh awmze nei zâwka hma lâk ho a nih theih nân inremna thuthlung (Agreement) 2018, April thla khan a lo sign-pui ve leh ta bawk a. Kum tina Phâr pual Pathianni thawhlâwm pawh tûn hma ang tho khân TLM rawngbâwlinaa hman tûrin BCM Headquarters Office-ah theih tûr a ni a. Tin, Aizawl leh Lawngtlai Area-a awmte tân Executive Secretary Office kaltlanga pêk theih a ni bawk.

BAPTIST WORLD ALLIANCE NĪ **(February Pathianni hmasa ber)**

BWA Din tan dân: Baptist World Alliance (BWA) hi khawvel pum puia Baptist kohhrante insuihkhâwmna a ni a. Kum 1905 khân London khawpui a Exeter (Ekzeter) Hall-ah din a ni.

John Newton Prestridge-a chuan kum 1904 khân Chanchinbu pakhat ‘The Baptist Argus’-ah khawvêl pum puia Baptist Kohhrante intawhkhâwm rawtna a chhuah a; chu thu chu John Howard Shakespeare-a chuan chanchinbu dang ‘The Baptist Times and freeman’-ah sawi mawi zuina a chhuah ve leh a. Chu thu bawhzui chuan Baptist Union of Great Britain (Sâp ram Baptist inzawmkhâwm) chuan October 1904 khân khawvêl pum puia Baptist Kohhran Inkhâwmpui (Congress) neih chu an rel thlu ta a. Tichuan London

khawpuiah July 1905 khân Inkhâwmpui hmasa ber chu neih a ni ta a ni.

BWA Din Chhan: Kum 1905 Inkhawmpui chuan Constitution mumal tak a siam ta a. “Khawvêl pum puia Baptist Kohhran zawng zawng hi Pathianin Isua Kristaa thil engkim fâwkkhawm a tum tipuitling tûra rinawm taka thawkho tûr leh khawvêl pum pui hi Krista ta a nih theih nana thawkho tûra BWA hi din a ni”.

BWA Special Sunday: Mizoram Baptist Kohhran hian kum 1978-ah BWA hi kan zawm ve a, full member kan ni. Tun hma deuh kha chuan BWA Day hi February thla Pathianni hnahnung berah hman a ni thîn a; kum 2005 aţang khân May thla Pathianni hmasa berah sawn a ni, Chumi hnu Kum 2016-ah BWA chuan February Pathianni hmasa berah sawn leh in BCM pawhin he ni hi kum 2017 aţangin tun thlengin BWA Day-ah kan hmang ta thîn a ni.

BWA Sunday zîng Inkhâwm thawhlawm hi BWA Headquarters “BAPTIST WORLD ALLIANCE 405

N. Washington St. Falls Church, Virginia - 22046, USA”-ah thawh thîn a ni.

BWA-ah hian ram 128 aṭangin Kohhran hlawm (Convention/Union) 246 kan awm a. Tualchhûng Kohhran 176,000 zet leh Baptisma chang tawh member maktaduai 51 (5,10,00,000) zet kan inzawmkhâwm a ni.

BWA Aid: BWA hian khawvêla chhiatna lo thleng thîn lirngghing, tui lian, thlipui, tâm leh indona vânga tuarna hrang hrangah te, rorêlna dik lo avânga mipui tuarna leh retheihnaah te, natna leh hri lêng avânga tuarnahte ṭanpuina hna a thawk thîn a. Mahni awmna hmun leh ram theuha nasa taka thawk tûr leh khawvêl hmun danga kan Baptist unaute nêna thawkhoa chutiang kawnga ṭanpui ngaite ṭanpui hna thawh te, ram rethei leh hnufual zawkte tâna hmasâwnna (development) hna thawh te hi kan hmalakna pawimawh tak a ni bawk. Lal Isuan “Ka ril a ṭamin nangnin ei tûr mi pe a; ka tui a halin in tur mi pe a; mikhual ka nihin mi thleng a; saruak ka nihin puan mi sintîr a; ka dam lohvin mi kan a...Hêng ka

unau te berte zînga mi pakhat chung a in tih chu ka chung a ti in ni,” a tih kha. Mihringte rawngbawlsak hi Pathian rawngbâwlna a ni (Service to man is service to God).

Jerusalem aṭanga Jeriko khuua kal tûr khualzin pakhat suamhmang tâwk, nasa taka sawisak leh thi chhawnga lum reng tawh, mahni insaseng thei tawh lo ṭanpui ngai Samari mi ṭhain a ṭanpui ang khan Lal Isuan, “Nang pawh chu ang bawk chuan va ti ve rawh,” a tih hi kan beng leh thilungah ri thar zêl se a va ṭha êm.

Kan khawtlâng leh ṭhenawmah te, kan kohhran chungkua ngeiah pawh chutianga ṭanpui ngai leh puih ngaite dâp chhuak ila; puithiam leh Levia chi anga pumpelh tuma hêl leh haider mai lovin Pathian hmingin ṭanpui leh chhawmdâwl hna thawk zêl tûrin inbuatsaih zâwk ila, kan theih tâwk a lian emaw, a te emaw mi dang, mamawhtute hnena thilpêk leh ṭanpui hna hi eng emaw ti tala thawk theuh turin BWA chuan Kohhran member tin Pathian hmingin min sâwm a ni.

MISSIONARY THLEN CHAMPHA (March 8)

Kan rama missionary hmasa ber Sap Upa leh Pu Buanga (Rev F.W. Savidge & Rev J.H. Lorrain)-te kha Zofate tân an hlu êm êm mai a. Kum 1894 January ni 11-a an lo chhuah khan Aizawlah kum li chhûng rawng an bâwl a. Zofate tan zirna lungphûm min phûmsak a, A AW B min siamsak a nih kha. Kan ram tâna an theihna leh thiamna la sâwr chhuah zawh lohte sâwr chhuak leh tûra BMS tirha chhim lama an lo chhuak leh hi Zofate tân malsâwmna nasa tak a ni.

BMS Missionary-te Mizoram-ah: Mizorama missionary hnathawk hmasa ber Sap Upa leh Pu Buanga (Rev F.W. Savidge & Rev J.H. Lorrain)-te kha an rawn kal hmasak zâwkah khân Silchar atângin Tlawng lui rawn zawhin Sairângah an lo chhuak

a, Mizoram leilung an rawn rap a. Mizoram hmâr lama kum 4 zet an thawh hnuah, Abor hnam, tuna Arunachal Adi-ho zînga an thawh leh hnu khân Baptist Missionary Society (BMS) tirhin Mizoram chhim lamah an lo chhuak leh a. Kum 1903 March ni 8-ah Tlabung an lo thleng a, hemi ni hi kan Kohhran Asssembly chuan ni pawimawh-ah puangin ‘Missionary Thlen Champha’ tih a lo ni ta a ni.

Sap Upa leh Pu Buanga te hian chhim lamah Baptist Kohhran tam tak an phun a. Zirna in leh damdawi in te, Sunday School-te, Bookroom-te, Printing Press-te, Bible lehlin te, Mizo tawng Dictionary siam te, Nau hnuchham enkawlina in te bul an tan a. Tirhkoh leh Pastorte lain tûna Baptist Church of Mizoram lo ni ta hi an rawngbâwlina rah chhuah liau liau a ni. Baptist Missionary Society London chungah leh kan Zo sâpte chungah hian bat tam tak kan nei a ni. He ni, Missionary thlen champha hi a hluin a ropui êm êm a. Vawiin hi Kohhranhoten Zo sâpte kan rama rawn hruai lûttu Pa Pathian hnêna lâwmthu sawi nân i hmang theuh ang u. Kohhranhote’n kan pioneer missionary-te rawngbâwlina hi kan ngai pawimawhin

kan hlut thiam sawt hle mai a. Tlabung tuipui kama missionary-te rawn kâina hmunah anmahni hriat rengna in t̃ha tak sain, helai hmun hi 'Missionary Kai' tia vuah a ni ta nghe nghe a ni.

A bul lama kan sawi ang khân hêng missionary hmatâwng pahnihte hi March 8, 1903 khân Tlabungah lo thlengin Mizoram chhim lamah rawngbâwl̃na an rawn t̃an ve leh a. Lunglei (Serkawn) ah inbêngbelin Mizoram Baptist Kohhran phuntute an lo ni ta a ni. He ni hi keini Baptist Kohhrante tan chuan a pawimawh hle a ni. Kan missionary hmasate avângin lâwmthu sawi ila, Baptist Kohhran hi missionary Kohhran kan nih zel theih nân chhungkaw tin leh member tin ten thlarau bo veina leh hmangaihna i nei thar zêl ang u.

TUMKAU PATHIANNI (Palm Sunday)

Hman a lo nih dân: Tun hma lam khân BCM Ni Pawimawh (special days programme)-ah Tumkau Pathianni hi telh t̃hîn a ni lo va. Kum 2012 a t̃ang khân Ni pawimawh programme-a telh a ni ta a ni. Kristiante ni pawimawh, a ni leh thla pangngai reng lo chi (movable feast) an tihte zînga pakhat a ni a, March-ah emaw, April thlaah emaw a thleng t̃hîn.

Tumkau Pathianni hi Lal Isua, Jerusalema lal a nih anga a luh ni hriat rengna ni a ni a. Pathianni a nih bâkah Kristiante tân ni pawimawh bik, Lal Isua lal a nihna puan chhuah thar lehna hun leh amah chawimawina ni atân hman a ni. Hetianga hmang hmasa bertute chu Jerusalem kohhran an ni a. Kum za bi 4-na tawp lamah an hmang t̃an niin sawi a ni. A tak taka Lal Isua

Jerusalem-a lal anga a luh aṭanga kum 300 hnu daihah he ni hi serh ṭan a ni chauh tihna a ni.

Tumkau Pathianni hi ‘Hnehna nena (Jerusalema) luhna ni’ (Triumphal Entry) ti pawhin sawi a ni bawk. He hun hi a pawimawh êm avângin Chanchin Ṭha bu ziaktu palite hian an ziake theuh a ni (Matt.21:1-17; Marka 11:1-11; Luke 19:28-42; John. 12:12-14). A pawimawhna chhan chu:

- 1) He khawvêla a awm chhûnga vantlâng hriat khawpa langsâra Jerusalem khuaa a luh chhun a ni.
- 2) Tisaa a awm chhûnga mipui vantlang chawimawi a hlawh ve ṭum a ni.
- 3) Vantlang hriata Lal a nihzia tarlan a a awm ṭum a ni.

He ni ropui takah hian mipui zînga a tam zâwkin Lal Isua kalna kawngah chuan an puante an phah bâkah chhâwl an sât a, an phah bawk tih Matthaia chuan a sawi a (Matt.21:8). Johana chuan Jerusalem mipuiten tumkau kengin an hmuak, a ti a (John 12:12-13). Lal Isua chu Galili ram aṭangin a thilmak tih hmutu

tam takin an rawn zui a, Jerusalem khawpuia chêng, amah ringtute’n an lo hmuak bawk a, amah rawn zuitute leh lo hmuaktute chuan rilru hmun khatin Lal Isua chu an theih tawkin an chawimawi a ni. Chutianga amah ngaisangtuten an chawimawina chu chhunzawmin, tumkau/hnahchhâwl chawiin Lal Isua chawimawina kawng zawh hi Kristiante zîngah neihzui a ni ta zêl a ni.

Tûmkau Pathianni-ah hian Lal Isua chawimawia tûmkau nêna kawng zawh hi naupang (KNP) tih turah kan dah deuh niin a lang a, a tâwk lo hle. Jerusalem chhehvêla mipui, Lal a nihzia la hre Chiang tak tak lotute mahin khati khawpa an chawimawi chuan, keini a hre Chiangtu, thinlung tihvâr tawhte hian theihtawpa chawimawi hi kan tih ngei tûr a ni.

GOOD FRIDAY

Good Friday hi Kristiante kût pawimawh tak tak pathumte zînga pakhat, khawvel chhandamna atâna Lal Isua Kraws-a an khenbeh ni hriat rengna hun a ni. Kristiante ni pawimawh, a ni leh thla pangngai reng lo chi (movable feast) an tih zînga mi kha a ni a. Kum za bi khatna aţang tawhin Kohhranhoten zirtawpni hi chawnghei tawngtâi ni atân an lo serh hrang tawh thîn a. Kum za bi 4-na aţang erawh chuan Easter Sunday hmaa Zirtawpni hnahnung ber chu Lal Isua kraws-a khenbeh a nih hriat rengna ni atân an serh ta a ni. A tîrah chuan ‘Holy Friday’ (Zirtawpni Thianghlim) tiin an sawi thîn a, ‘Great Friday’ (Zirtawpni Ropui) an ti bawk. Kum za bi 6-na vel aţangin Rom Kohhranin ‘Good Friday’ an ti ta a, chu hming chu a pu hlen ta a ni.

Mizote leh Good Friday: Zofate Kristian kan lo nih tîrh aţangin a awmzia tak kan man hma pawhin

Missionary-te zirtîrna aţangin Good Friday hi kan serh thîn a. Kan serh dân erawh chu khaw hrang hrangah a inang vek lo. Khua/Kohhran then khatin an lâk urhsûn viau laiin Kohhran thenkhat chuan a hming chauhvîn an serh a. Hun lo kal zêlah Lal Isua sînna rilru nên hun hman a ni thîn a, pulpit leh a chhehvelah puan dum te an zâr thîn a, an ngai urhsûn ta zêl a ni. Khaw thenkhatah pheî chuan mitthi dâr te pawh an vaw hial thîn a ni awm e. Kan Mizo hlaphuahtute pawhin chutiang lam zâwnga rilru hruai thei tûrin hla an phuah nual a. Lal Isua tuarna leh a hmangaihna/khawngaihna tarlanna lam hla hi Mizo Kristian ten kan neih tam ber pâwl a ni awm e.

Hun lo kal zêlah Lal Isua thihna awmzia kan hriat fiah angzia zêlin kan hun hman dân leh kan rilru put dân pawh a danglam chho ta zêl a ni. Pathian fapa sual rêng rêng hre lo, mihringte chhandam nâna a inpêkna avânga kraws-a khenbeha a awm hi khawvêl history-a thil thleng ropui tak leh pawimawh tak a ni. Chuvângin a chhandamna changtute chuan he ni hi kan ngaisangin, urhsûn takin kan serh zêl tûr a ni ang. Vawiinah hian Kohhranhoten kan tana Lal Isua inpumpêkna kan hre reng a ni tih lan tir nân, a tuarna tawmpui chungin a hnênah inhlan thar leh ang u.

EASTER SUNDAY

Easter Sunday hi Kristiante ni pawimawh, a ni leh thla pangai reng lo chi (movable feast) an tih zînga mi a ni a. Kristiante kut pawimawh pathum-Christmas, Good Friday leh Easter Sunday te hi mihringte chhandamna siam tura Pathian Fapa, Isua Kristan he khawvêla a hun hman leh tawn ropui tak takte an ni. Krismas hi mihringte tan lawmna ni a nih laiin, Lal Isua tân chuan tuarna a rawn tan hun a ni a. Good Friday hi tuarna vawrtawp a tawh hun a ni. Easter Sunday hi thihna hneha a thawhleyna ni a nih vângin, lâwmna ni ropui tak a ni. Tirhkoh Paula chuan, “Ama rualin a tinung che u a ni,” a ti hial a ni (Kol.2:13). Chuvângin Easter Sunday hi a ropui chungchuang a ni. Tirhkoh Paula chuan Krista thawhleyna chu kan rinna inngahna bul leh a

Chanchin Tha hril inngahna a ti hial a ni (1. Kor. 15:14, 17).

Easter an lo hman thin dân: Hun hmasalama Kohhran lo kaihruai thintu- ‘Kohhran Pa’ an tihte chuan Lal Isua thihna, phûma a awmna leh a thawhleyna te chu Kalhlên kût zawh hlimchhâwna thleng a nih avângin, Easter Sunday hi Juda-te Kalhlên kût zawh Sunday hmasa berah hman an duh a. Chutih laiin Judate hun pawimawh calendar (holiday calendar) chu calendar pangngai angin a kal lo va, ni leh thla her dânin a hril zawk a. Hemi chhût dân pakhatat chuan khawvêl hmun tinah kum khata chhûn leh zân rei zawng inchen ni ‘equinox’ pahni (March 21 leh September 22) zînga a hmasa zawk [vernal (spring) equinox] March 21 hnua thla bial zân hmasa ber dawta Sunday hmasa ber tiin chhut a ni baw k thîn. Hei vâng hian Easter Sunday, Good Friday leh Palm Sunday te hi ni (tahrik) bik nei lo, insawn thei (movable) an ni a, kum hrang hrangah an thlen hun a inang lo ta thîn a ni. Nicea Inkhâwmpui-in ngun taka a ngaihtuah hnuah tâna kan hman lai mêk hi a lo rêl dân a ni a. Good Friday leh Palm Sunday te pawh hi Easter Sunday

aṭanga chhut lêta zirtawpni hnahnung ber leh Sunday
hnahnung ber te an ni ta zêl a ni.

A hlutna: Engpawhnise, a hun bi (tahrik) hi a
pawimawh ber a ni lo a, kan serhna chhan tak, Lal Isua
hun tawnga thil thlengte kha kan chhandamna kawng
min siamsakna a nih avângin, chûng hun hriatrengna
atâna Kohhran hmasaten hun bi an lo chhiar dân
zawm mai hi a ṭha a, Kohhranhoten lungual taka
kan hman ṭhin hi Pathianin min pawm pui a ni tih
a Chiang a. Tun ṭumah pawh hian Kohhranho ten
Pathian pawlna kan dawn tharna hun duhawm tak
atân i hmang ṭangkai leh ṭheuh ang u. Kristan ama
ruala a tih nun te kan ni a. A hlutna hre reng chungin,
hlim takin kan hmang dawn nia.

KRISTIAN NAUPANG PAWL NI
(KNP DAY)
(April 23)

KNP lo din ṭan dân: Serkawn Kohhran Upa
Committee chuan veng chhûnga naupangte
inkhâwm lama an lo inthlahdah deuh avângin naupang
huaihawt veltu, inkhâwm pui tura khaikhawmtu
inruat ila tih a rêl angin Zosap Mrs. E.M. Oliver (Pi
Zoduhi) leh Pi Rovi chu naupang lo buaipui tûrin
March 29, 1943-ah an ruat a. Anni chuan hma lain
April 23, 1943 Easter Sunday khân an inkhâwm pui
a. Hemi ni aṭang hian mumal takin naupangte chu an
inkhâwm ta ṭhîn a. Hei hi KNP rawn inṭanna chu a
ni a. BCM Assembly chuan KNP din ni (KNP day)
atân April 23, 1943 a pawm ta a ni.

A tîrah chuan KNP hi “Kohhran naupang pawl” tiin an sawi thin. Tunah chuan Kristian Naupang Pawl (KNP) tih a lo ni ta a ni. Chawlhni zîng inkhâwm pui chauh ni lovin a hranpa a inkhâwmnate chawlhni tûk te, chawlni chawhnuah te Tualchhûng Kohhran remchân anga hmanpui thîn an ni

Assembly hriatpuiin: Kum 1967 Assembly chuan khaw tinah naupang inkhâwm neih ni se, Literature Department Committee-in a kaihhruaina siam rawh se, a ti a. Literature Department Committee-in ruahmanna a siam ang chuan kum 1968-1983 chhûng KNP chu BKHP ten an enkawl a. BKHP ten an enkawl lai hian thuzir tûrte kum tin a buatsaihsak thîn.

Mizoram pum leh bial hrang hrangah KNP hruaitute tân leadership training a siamsak thîn a. KNP-te chawmin evangelist teacher pahnih tuikuk (bru) zingah rawih a ni a, kum 1980 aţang khân evangelist teacher 4 rawih an ni. Hemi atân hian target-te an siamsak thîn a, an target chu Unit leh Bial ah BKHP ten an ngaihtuahpui thîn.

BCM Assembly ruahmanna angin 1984-1994 chhûng Sunday Sikul enkawlna hnuaiah KNP chu a awm leh a, a hrana zirlaibute siamin tha takin an enkawl a. BCM chuan kum 1995-ah Christian Education Department siam tharin chu mi hnuaiah KNP pawh chu a dah ve leh ta a, kum 1995-2001 thleng KNP enkawl hna chu Christian Education Department chuan a lo thawk ve leh ta a. Kum 2001 Assembly chuan KNP chu Fellowship Organisation Department (FOD) hnuaia Fellowship pakhat angin a dah leh a. Hemi kum aţang hian KNP bik enkawl tûrin KNP Promoter ruat a ni a, Kristian Naupang Pawl (KNP) chu Fellowship Department hnuaiah a awm ve ta a ni.

Thuzir: KNP-te hian kum tin thuzir an nei thîn a. Headquarters aţanga siam a ni a, an thuzirte hi November Pathianni hmasa berah an exam thîn. Thuzir bu hi KNP member zawng zawngten neih theuh i tum ang u.

Naupangte Thian: KNP-te hian chanchin bu an nei ve a, chu chu Naupangte Thian a ni. Naupangte Thian chhuak hmasa ber chu Jan-March, 1997-ah

a ni a, ʈahnem ngai taka a bul lo ʈantute avângin tûnah chuan hma kan sawn chho hle a, a copy pawh a pung chho zêl a, a lawmawm hle. Unit leh Bial tam zawkten kan la tawh a, Naupangte ʈhian la lo Unit kan la awm nual mai a, la lo Unit-ten lâk vek tum a ʈha hle. Naupangte ʈhian Chanchinbu lâk hi KNP te rawngbâwlna pawimawh tak a ni. Missionary-te tân bâkah damdawi in leh Home hrang hrangte tân pawh a laksak theih reng a ni.

Rawngbâwlna pêng dang: Heng bâkah hian KNP zinga rawngbawlna hrang hrang- hêng KNP Inkhâwmpui te, KNP Pual Seminar bâkah KNP hruaitute buatsaih kawnga hmang ʈangkai tûrin KNP Leaders Trainer eng emaw zât a ruat bawk a, Hêngte hi Unit leh Bial ang pawha hman ʈangkai theih an ni. A theih chin chinah kan trainer-te zêl hman tum ni se.

BUHFAIṬHAM PATHIANNI **(April Pathianni hnuhnung ber)**

Buhfaitham lo chhuah dân: Kum 1908-ah Khasi Rama nu pakhat rilruah chuan chaw chhum apiangin buhfai vei khat lek lekin dah ila, Kristian tinin kan tih chuan nasa takin hna a thawk thei ang tih rinna a lo piang a. Chutiang chuan a ti ta nghâl a. Rei lo tê chhûngin Kohhran pawhin a ʈatzia an hre ta a. Khasi ram pawh a luan chhuak ta thuai a ni. Chu chu Mizoram hmâr lamin an la chhâwng a, chhim lam pawhin kan lo ti ve ta thuai a ni. (*Mizoram Baptist Kohhran Chanchin pawimawh lâkkhâwm Part 1 page 36*)

Ṭham ʈan kum leh hman ʈan dân: Buhfaitham ʈan kum hi F.W.Savidge (Sâp Upa) report-a a lan dân chuan kum 1915-ah an ʈam tawh a, Presbytery

minutes-ah chuan kum 1919 hi a lanna hmasa ber niin a sawi. Kum 1973 Assembly chuan buhfaitham rawngbâwlina hi Kohhran kutah a dah a, BKHP ten an khawn a, Kohhranin a buaipui thin. Kum 1982 aţang pheĩ chuan Assembly-in BHKP kutah mawhphurhna zawng zawng a dah ta a. April Pathianni hnuhnung ber hi Buhfaitham Pathianni a hman a ni ta a ni. Sum tling khawmte chu Tualchh ung Kohhran kaltlangin ramthim (Mission) lamah chh  n luh th  n a ni.

A hmanna: Buhfaitham hi a t  r lamah chuan Kohhran sumpuiah hman a ni th  n a. Kum 1919 Presbytery chuan buhfaitham z  nga mi hi hmeichhe tirhkoh hlawh at  n hmang ila an tih angin hman a ni ta a. Hmeichhe tirhkoh an awm loh hnuah sumpuiah a l  t leh a, a t  l ang anga hman a ni.

Kum 1947-ah Nursery School din a lo ni a, zirt  rtute hlawhah hman a ni leh a. Nursery school pawh chu kum 1968-ah a t  wp ta a. Hemi a  ng hi chuan Mission pualah hman a lo ni ta a ni. Buhfaitham pawisa hi t  n thlengin ramthim rawngb  wlina   ngkai tak a ni ta z  l a. Assembly-in BKHP-te kuta a dah angin a man z  t

siam leh a sum l  kkh  wm a tum a, Kohhran-ah a sum chu thehluh ngh  l z  l a ni.

Sum hmuh d  n: Presbytery minutes-ah kum 1919 hi a lanna hmasa ber ni mah se, pawisa a lang lo va. Kum 1920 a  ngin pawisa z  t t  rlan a ni. Hetih hun laia pawisa chhiar d  n chu ch  ng-ana-pai (Rs a p) tiha zia  k a ni a. Hei hi kum 1952 thlenga hman a ni.

Kum 1920-1921 thlenga BCM pum puia pawisa hmuh z  t chu Rs 446 ana 10 pai 9 a ni. Kum 20 hnu, kum 1941-ah chuan hma kan s  wn ta deuh a, ch  ng 1,162 ana 11 pai 8 a ni a. Kum 1952 a  ngin hma kan s  wn ta viau a, ch  ng s  ng chuang f   a ni ta a. Kum 1972-1973-ah chuan Nuai chuang daih a lo ni ta a. Kum 1979-1980-ah chuan maktaduai chuang fe a lo ni leh ta a. Mite thinlungah Pathian ram t  lna a lo lang z  l a. Kum 2022-2023-ah pheĩ chuan Rs 104,302,982 a lo tling ta a ni. A va ropui   m! He rawngb  wlina hi nasa taka mals  wmin a awm a ni.

Mizoramin Pathian mals  wmna kan dawng nasa hl  . Kum 2014-ah BCM Mission chuan kum 75-na a lawm ta a. Kum 2015-ah chuan missionary, local worker-te

nen sângkhat aia tam kan lo nei ta. Missionary tam zâwk tîr chhuak tîr chuan sum tam leh zual a ngai a, Buhfaitham-ah hian chhûng tinten tan kan lâk leh zual chuan missionary tun aia tam kan tîr thei ngei ang.

Tirhkoh Paul'an, "Amah aţang leh, amah avâng leh amah atân thil zawng zawng a lo awm a ni si a." (Rom 11:36) a tih angin engkim min petu Lalpa hnênah kan Buhfaitham hi lâwm takin i hlân ang u. Chhûng tinten he ramthim rawngbâwlna pawimawh tak hi kan tu leh fate hnênah pawh hrilhin tâna nu leh pate kan awm tawh loh hnu pawha an ngaih pawimawh zêl theih nân "Lalpa pual" buhfaitham bêl/bûr i hûng theuh ang u. Rawngbâwla kal chhuak thei lote pawhin mahni in chhûngah hahdam takin ramthim-ah rawng kan bâwl a ni tih hre thar lehin tan i la sauh sauh ang u.

**BAPTIST KOHHRAN HMEICHHE PAWL NI
(BKHP DAY)
(May 2)**

BKHP lo din chhoh dân: Kum 1938 March thlaah BMS missionary Pi Zirtiri (EM Chapman) hovin, 'Kristian Nula Tlawmngai Pâwl (G.A/Girls Auxiliary) chu Assembly hriatpuina leh kaihhruainain Serkawnah din a ni a, hruaitute chu: Nl. thenvungi President, Nl. Laltinchhingi Secretary leh Nl. Nuchhungi Treasurer te an ni. Thuvawn atân, 'Ka Lalpa'n tih tura min ruatsak apiang chu ti tûrin ka inpeih reng e' tih an hmang a. Hei hi Sapram a G.A. te pawhin thuvawn atâna an hman lai a ni. 1939-ah chuan G.A. hruaitute leh mi thahnemngaite chu thingtlângah zinin G.A. branch din duhte chu an dinpui zel a, 1945-ah chuan khaw

35 laiah branch a lo ding ta a. G.A. te hian rim takin an thawk a, chhûngkaw tanpui ngaite tanpui chu an tum ber pakhat a ni.

GA hian nula chauh a huam avângin kum 1947 khân nu thahnemngaite chuan Nu Pawl an lo din ve leh ta a. Nu pawl hian inkhâwmnate nei hrangin rawngbâwl na hrang hrangah hma an la chho ve zêl a. Chutianga hmeichhe zînga pawl pahni awm chu Mizoram Baptist Kohhran Assembly hotute chuan fel tâwk lovin an hria a. Tichuan Nu pawl leh Nula pawl chu pawl khatah dahin Baptist Kohhran Hmeichhe Pawl (BKHP) din a lo ni ta a. Assembly hriatpuiin March 20, 1965-ah a lo ding ta a ni. He pâwl hian Baptist Kohhran hmeichhia zawng zawng kum 14 chunglam a duh apiang chu a huap vek a ni. 1971 April thleng khan committee neih phal a ni lo va, ‘inrawnkhâwmna’ tih a ni thîn a, 1971 May thla atangin Committee meeting neih phalsak an lo ni ta a ni.

Kum tinin BKHP Day March 20, 1989 thleng khan hman a ni thîn a, hmeichhe rawngbâwl na kum sawmnga a lo tlin khân May 2, 1988-ah BKHP Golden Jubilee hman a ni a, MBKHP executive Committee chuan khawi zawk nge BKHP Day-ah hman tûr tih BCM General Committee ah a thlen a, BCM General Committee chuan May 2 ah BKHP Day hi hman tawh ni se, G.A din atângin a kum zat pawh chhiar ni se, a tih angin kum 1990 atâng chuan May 2 hi BKHP Day atân hman a lo ni ta a ni. BKHP chuan kum 75 lo tling tawhin kum 2013-ah Platinum Jubilee hlim takin kan lo hmang tawh a. Lalpa chu fakin awm rawh se.

Thutiam: “Ka Lalpain tih tûra mi ruatsak apiang chu ti tûrin ka inpeih reng e,” tih hi G.A. a nih lai atanga tun thlengin BKHP thutiam a ni.

BKHP din chhan: BKHP din chhan chu “Pathian ram a lo zau zel theihna tûra Kohhran, khawtlang, leh chungkuuaa rawngbâwl hi a ni”.

A thil tum te:

- 1) Pathian thu hriatna leh rinna kawnga hmasawn
- 2) Kristian chungkaw din.
- 3) Pathian thua fate kaihhruai
- 4) Chanchin tha hrilhna kawnga theihtawp chhuah
- 5) Assembly in buhfaitham enkawl tûra a ruat anga enkawl.
- 6) A tul ang apiang Kohhran leh Khawtlâng tâna thawh.

Baptist Kohhran Hmeichhe Pawl hian G.A hun lai atangin vawiin thlengin BCM hmalakna chi hrang hrangah hma kan la nasa ve êm êm a, mission rawngbâwlina leh damdawi in te, nauhnuchham (BCO) enkawlinaah pawh theihtâwp kan chhuah zêl a, TLM rawngbâwlina leh AICS te, HATIM ah te pawh theihtâwp kan chhuah zêl hi Lalpa duh zâwng a ni tih hre thar leh ila, hma lam i pan zêl ang u.

MBKHP in kum 2000 atanga 'Chhawmdawlna In' a lo buatsaih te hi Pathian khawngaihna a ni. Thalai tam tak, nu te pawh Chhawmdawlna In-ah an tlu lût thîn a, taksa leh thlarau damna chang eng emaw zât an lo

awm ta a, Pathian thu zir mekte pawh Chhawmdâwlina In atang hian kan lo nei ta a, nasa lehzualin tawngtai leh thilpek i hlân zel ang u.

BKHP hian India hmarchhakah te, India Baptist Hmeichhe Pawlah leh Asia Baptist Hmeichhe Pawlah te, khawvêl Baptist Kohhran Inkhâwmpui lianah te palai kan tir ve thei ta hi hmasawwna ropui tak a ni. Tunlai khawvêl sual tak leh bawlhhlawh tak kârah hian kan meichher chhi eng zel ila, kan Kohhran, Khawtlâng leh kan ram siam tha tûrin kan thlen chin atanga hma sawn zêl turin tan la ila, Pathian i au ang u.

BAPTIST MIPA PAWL NI
(BMP DAY)
(May 4)

Baptist Mipa Pawl (BMP) hi Thingsaiah May 4, 1980 khan din tan a ni a. Chutih lai chuan a hming hi sap tawngin “Baptist Men’s Fellowship” tih a ni a. A hming hi Mizo tawng ngeia dah tha tih a nih angin 1983-ah BAPTIST MIPA PAWL (BMP) ti a thlak a ni. A din atanga rei lo te, BCM Assembly 1988-ah BMP chu Tualchhung Kohhran hnuaiah fellowship pakhat ni tura pawm a ni a. Fellowship dang lo ding tawh te TKP leh BKHP angin Unit a lo ding ta zel a. BCM Assembly chuan BMP te inkaihhraina dân ruahmante chu pawmin mumal zâwkin a kal ve ta zel a ni.

Bial hrang hrang atangin BMP ram pum huap Inkhâwmpui nei tûra dilna te a lut thin a. Chûng hun laia FOD Committee chuan ngun taka a ngaihtuah hnuah, tum khat atân 2014-ah khan meet nei tûrin Central Committee-ah thlenin phalsak an ni a. Hlung takin August 8-10, 2014 khan Lunglei Bazar veng biak inah ram pum huap BMP Meet vawi khatna neih a ni. Hei hi BMP tân kum chhinchhiah tlak ‘mel lung’ a ni reng tawh dawn a ni. Tichuan, kum 2017-ah Zobawkah leh 2021-ah Thingsaiah Meet hi neih a ni leh a. Baptist Mipa Pawl te tân mai ni lovin, Mizoram Baptist Kohhran tân pawh chhinchhiah tlak tak a ni.

Tuna BMP dinhmun: Kum 2020 BCM 5th Planning Commission rawtna angin Assembly 2021 chuan BMP chu Fellowship dangte anga ram pum huapa din a rem tih angin September 7, 2021-ah Mizoram Baptist Mipa Pawl (MBMP) chu din a ni ta a. Full time Secretary neiin kalpui a lo ni ta a. Ram pum huapa rorel leh Inkhâwmpui pawh neih phalsak an ni a. MBMP Rorel hmasa ber chu February 4, 2022

khân Lunglei Chanmari biak inah neih a ni a. Tin, MBMP Inkhâwmpui hmasa ber pawh February 10-12, 2023 khân Hnahthialah neih a ni.

Tunah chuan BMP te chu Tualchhûng Kohhran hnuaiah Unit 335 lai awm tawhin Pastor Bial 78-ah bial BMP din a ni tawh a. Pastor Bial huapa rorel leh Inkhâwmpuite pawh neih a ni ta zel hi Kohhran leh Pathian ram tân chhenfakawm tak a lo ni ta zel a ni.

MBMP din a nih tâkah chuan Unit leh Pastor Bial BMP te chanchin in hriat pawh awlsam zawkna tûr leh rawngbâwl na hmanrua atân ‘**BMP AW**’ thla thum dan (quarterly) ah tih chhuah a ni ve ta a. Mizoram Baptist Mipa Pawl te Pathian leh Kohhran tâna tângkai zawka rawngbâwl zel tûrin ke an pen mêk zêl hi a lâwmawm hle. Lalpa ropuina tûr lo ni zêl rawh se.

BMP Din chhan: Baptist Mipa Pawl hian dihchhan leh thiltum mumal tak a nei a, chûngte chu:

- 1) Baptist mipate thlarau nun buatsaih leh tihchak.
- 2) Kristian chhûngkaw din.
- 3) Kohhran tâna kutke tângkai nih.
- 4) Khawtlâng thatna tûra thawh.

BMP Thuvawn: BMP chuan thuvawn a nei a, hetiangin: “Kei leh ka chhûngte erawh hi zawngin Lalpa rawng a nia kan bâwl dawn ni”. (Josua 24 : 15b).

KRISTIAN CHHUNGKAW NI (May thla Pathianni vawi thumna)

Kum 2003 Assembly-a Kristian Chhûngkaw Chawlhkâr hman nise tia rawtna thu lo lut chu rem tih a ni a; Kum tin Kristian Chhûngkaw Ni (Pathianni) behchhanin, kar tluanin kan hmang ta zêl hi a hluin a lawmawm hle mai.

Ni pawimawh a lo nih dân: Kum 1948 khan North East India Christian Council (NEICC), khatih laia Assam Christian Council (ACC) inkhâwmpuia Baptist Kohhran palai zu kalte chuan Assembly-ah report an pe a. Kristian chungkaw pawimawhzia hi uar takin an sawi a. Assembly chuan, “Kohhran tinin bawhzui ni se la, May thla Pathianni remchâng ber chu Kristian Chhûngkaw niah hmang ila; chhûngkaw inenkawlina pawimawhzia leh chhûngkaw hlutnate hi sermon-ah thusawitu apiangin sawi thîn rawh

se,” tiin a rel a. Tichuan, kum 1948 aţangin Kristian Chhûngkaw Ni hi kan lo hmang tan ta a ni. Tûnah chuan BCM Calendar-ah nghet taka dahin May thla Pathianni vawi 3-na hi kum tin Kristian Chhûngkaw Ni atân kan hmang ta a ni.

Kristian Chhûngkaw Chawlhkâr: Kum 2003 Assembly-a Kristian Chhûngkaw Chawlhkâr hman rawtna rem tih a nih tâk avângin, Kristian Chhûngkaw ni behchhanin kâr tluanin hman a ni a. A hnuah kum thum lai azâwna he thu hi a lo luh tak avângin, kum 2005 Assembly chuan rel chawp zêl ngai lovin kum tin Kristian Chhûngkaw chawlhkâr hi hman tûrin a rêl ta a ni. Tichuan, Kristian Chhûngkaw Chawlhkâr hi kum tin kan hmang ta zêl a ni.

Kan rama sualna lo pung zêl hi chhûngkua kan inenkawlina lama kan hlawhchhamna rah a tih loh theih loh a. Kohhran leh kan ram damna tûr hian chhûngkua kan dam tlan hmasak a pawimawh a. Chuvângin, Kohhranhote pawhin Kristian Chhûngkaw chawlhkâra kan thûzir Headquarters aţanga buatsaih hi ngai pawimawh ila, urhsûn takin i kalpui zêl ang u.

THLARAU THIANGHLIM THLEN NI

Hun rei tak chhûng chu ‘Thlarau Thianghlim thlen ni’ atân programme hranpa buatsaih a ni ngai lo va. Tualchhûng Kohhran tinin tha kan tih dân angin kan hmang thîn. November 25 & 26, 2009-a Service Committee Meeting chuan he ni hi inang tlânga hman thîn tûrin programme buatsaih ni se, tiin a rel a. BCM Ni Pawimawha chuantîr a lo ni ta a ni.

Thlarau Thianghlim thlen ni kan hman chhan: Khawvel pum huapa Kristiante Calendar-a ni pawimawh, kum tin an hman thîn zawm vein kan ramah pawh hian Kohhran tiah tih atangin kan hmang thîn a. “Penticost ni” tiin kan lam ve mai a, Sunday School zirlai buah pawh kan dah dân tam ber a ni thîn. BCM Assembly chuan hei hi dik chiahin a hre lova, (Judate kût chhawm zui zêl kan nih loh

avangin) “Thlarau Thianghlim Thlen ni” tiin hman turin a pass hial a ni. Thuthlung Thar hun lamah chuan Tirkkohte Thiltih Bung 2-a kan hmuh Thlarau Thianghlim thlenna chuan Juda-te kût chu Kristiante kûtah a chantîr (transformed) a. (The New Compact Bible Dictionary). He ni hi baptisma channa ni atân an ruat bawk thîn. Hemi nia baptisma chang zoten kawr fual vâ an hâk thîn avângin, White Sunday (Sunday Var) tiin an vuah phah bawk. Isua thawhleh ni atanga chhûta ni sawmngâna a ni. Isua thawhleh ni atanga chhiar a nihna chhan hi Leveticus 23:15-a pâwl kût chhiarna “Chawlhni tûk tûk leh (from the morrow after the sabath) ... atangin in chhiar ang a...tih hi, ni sarîh ni hmasa ber (Sunday) hi a ni si a. Khawvel Kristian tam berten kan hman dân a ni vek a ni. A pawimawh ber zâwk erawh chu Thlarau Thianghlim thlennain Kohhran a dân a, a tiharh a, a chen chilh a, thiltihtheihnain a thuam hi ni.

A lo chhuah dân: Judate kût pawimawh tak chawlhkâr kût tia an sawi, pâwl kût tih leh buh seng kût (cf. Lev. 23:15-16; Ex. 23:16; 34:22; Deut. 16:9-10) tia an sawi bawk chu Grik tawngin pentecost tih a ni a,

sawmngana tihna a ni. Thuthlung Hlui hun atangin kalhlên kût dawna Sabbath ni hmasa ber atanga chhiar a ni 50-naah he kût hi a thleng thîn. Thlarau Thianghlim hi Lal Isua thawhle ni atanga chhuta ni sawmnganaah a lo thleng a, Thlarau Thianghlim ringtute hnêna leih a nih ni chiah a lo ni bawk a. Chuvângin Thlarau Thianghlim thlen ni tiin kan sawi ta a ni.

Kristiante tana a pawimawhna:

- 1) Pathianin Mosia kaltlanga Sinai tlanga Dan a pêk ni nia ngaih a ni a, a pawimawh hle.
- 2) Pathian hnêna lawmna thilpêk an hlan hun kha a ni (cf. Ex. 23:16; Lev. 23:21).
- 3) Pathian be tûra Judate Jerusalema an kalkhawm thinna kût ni a ni, an tân a hlu zual.
- 4) Ringtute chenchilh tur leh thlarau lam dan thar pe tura Thlarau Thianghlim lo thlen ni a ni.
- 5) Thuthlung Thar kohhran pian niah ngaih a ni a, a pawimawh hle.
- 6) Chi tin leh hnam tin hnêna kristiante thuchah (message) puan tûr chhinchhiahna a ni.

ṬKP RAMTHIM NI (May 29)

ṬKP Ramthim Ni lo chhuah dan: ṬKP hian a din atangin Ramthim veina lian tak nei in, Ramthim rawngbâwlina lamah pawh hma a la tan hma hle. District ṬKP Inkhâwmpui hmasa ber, Oct 21-23, 1955 (Pukpui)-ah chuan Agenda “ṬKP hminga Thuhriltu tirh” tih hi ngaihtuah a ni a. Inkhâwmpui vawi hnihna 1956 (Hnahchang)-ah pawh “Tuikuk Takam pual bik neih” tih rêl a ni leh a. Mahni remchan angin Tuikuk-Takam pual hian hun hman thîn a ni, Tin, hemi pual a thawhlâwm an lâk khâwm pawh Ramthim puala hman atân Headquarters-ah chhunluh thîn a ni. Kum 1959-ah chuan ‘District ṬKP Tuikuk-Takam Ni’ atân October 5 (Thawhtanni) hman ni se tih a ni a, 1960-ah chuan September thla Thawhtan

ni hnunung ber hman ni se tiin rêl leh a ni a, chumi kum chuan September thla thawhtanni hnunung ber chu September 26 a ni.

September 26 hi hun rei tak chhûng chu Ramthim pual atân hman zui a ni ta zêl a ni. *‘Tuikuk-Takam Ni’* tih chu huap zîm deuha hriat a nih avângin 1969-ah chuan **‘Ramthim Ni’** tiin thlâk a ni. Amaherawhchu September thla hi Beirual thla a nih avângin ṬKP tâna Ramthim ni hman hi a remchang tâwk lo deuh thînin hriat a ni a. Kum 2006 MṬKP (S.Vanlaiphai) Rorelna chuan May thlaah sawn ni se tiin a rêl a. MṬKP Executive Committee chuan bawhzuiin BCM-in ram pawna missionary a tîrh chhuah hmasak ber, Rev. H. Rokhama-te nupa tîrh chhuah ni, May 29, 1968 denchhenin May 29 hi ṬKP Ramthimni atân a ruat fel ta a. 2007 aṭang chuan kum tin ṬKP Ramthim Ni hi May 29-ah hman a lo ni ta a ni. ṬKP Ramthim Ni-ah hian inkhâwm buatsaih thîin a ni a. Heta thawhlawm lâk khâwmte hi Headquarters-ah chhûng lûtin Mission rawngbawlna atân hman thîin a ni.

ṬKP leh Mission rawngbawlna: ṬKP Ramthim Ni-ah hian inkhâwm buatsaih thîin a ni a. Heta thawhlawm lâk khâwmte hi Headquarters-ah chhûng lûtin Mission rawngbawlna atân hman thîin a ni. MṬKP, Bial ṬKP leh Unit-in Missionary Support an pe thîin a. A theih ang angin Mission rawngbawlna lamah ke a pên mêk a ni.

RELIEF SUNDAY (June Pathianni vawi thumna)

Relief Sunday hman tan a nih dân: Kum 1966-1968 lai vel khân Mizoramin hun khirh tak tak a tawh chho a. Mau tamin min nuai hnu lawkah Mizoram buaiin min nang zui a. Chubakah, tihluhnaa khaw sawikhâwmin kan awm a. Mizo mipuite kan mangang tak zet a ni. Hêng harsatna laka min chhawmdâwl tûrin India ram leh ram pawn thlengin Kohhran kal tlangin tanpuina (relief) kan dawng thîn a. Heng tanpuina kan dawnte hi mumal taka kan sem chhuah theihna tur leh kohhran pawhin mipui mangangte tanpuina tur thawhlâwm (Relief Fund) a bika siam tha a ti bawh a.

Hun khirh zual reh tawh mah se, he chhawmdâwl rawngbâwlina hi Kohhrante thinlungah tuh thar zêla,

kan uar deuh deuh theih nân kum tiin June thla Pathianni vawi thumna zêlah hman tûra rel a lo ni ta a ni. He rawngbâwlina fawng chelhtu atân Assembly chuan 1990-ah Relief and Development Department (R&D) a din a. He department kaltlang hian nasa takin hma a la a. BCM aiawhin a tûlna apiangah tanpuina leh chhawmdâwlina hna chu vawiin thlengin a thawh ta zel a ni.

A pawimawhna: Pathian thuin a sawi angin khawvêlah mi hausa leh mi rethei kan awm zaa (Thuf.22:2). Tui lian, thli tleh, lîrngching leh lei min adt. avanga chhawmdâwl ngai an awm reng a. Chhawmdâwlina hna thawh tûrin tûnah chuan BCM Headquarters-ah chauh ni lovin, bial leh Tualchhûng Kohhranah pawh Relief & Development Committee din a lo ni ta zel a. Tangkai takin chhawmdâwl ngaite chhawmdâwl hna a thawh mek a ni. Hemi nia thawhlâwm hi Tualchhûng Kohhran tinin headquarter-a thawh lovin mahni Kohhranah relief hna thawh nân hman tûr a ni.

MISSION SUNDAY (July Pathianni hmasa ber)

Mission Sunday hman a lo nih dân: Kum 1949 khân July Pathianni hmasa ber zîng thawhlawm hi Tuikuk-Takam pual atân Assembly chuan a ruat a. Hun eng emaw chen a khaihlak deuhva, kum 1975 khan tithar leh in July Pathianni hmasa ber hi Mission Sunday atân hman a lo ni ta a ni.

Zoram Baptist Mission tobul: Mizoram Baptist Kohhran hian a din tîr aţangin Chanchin Tha hril hi a pianpui a ni kan ti thei awm e. Ringthar hmasate pawhin a tîrte aţangin ring lote Krista hnêna hruai hi thupui berah an nei tlat a. Thlarau Thianghlimin a thuam a, Mizoram chhûng chauh ni lo, an chhehvela Mizo hnahtlak Bangladesh leh Tripura a awmte an vei êm êm a ni. Ringtu hmasate zinga pastor, Rev. Zathanga pawhin Miria, Bawm, Pâng leh Lau awmna ram a fan thu a thih hma khan a sawi thîn. Kum 1918 khan Chanchin Tha hril tûra inpete chuan Tripuraah

lutin Kohhran nghet tak an phun a, tûn thlengin Tripura hnam hrang hrang tiêng tûrin an pawimawh hle a ni.

Tichuan hnam dangte veina a lo lian zel a, Mizoram chhûnga Tuikuk-Takamte veina pawh a lo lian zel a, kum 1939 Chapchar Assembly, Thiltlânga neih chuan a ngaituah ta a, chutah chuan tîrhkoh pahnih rawih rêl thluin Easter Sunday zing thawhlawm hi mission bik atân dah a rel nghal a. Tuikuk-Takam puala thawhlâwm hmasa ber tîng khâwm hi Rs. 244/- chiah a ni. Tîrhkohte hlawh atân thla khatah Rs.11/- an fixed nghâl bawk.

Ramthim veina a lo len zêl tak avângin July11-12, 1962 a Assembly Executive Committee chuan Ramthim Sub-Committee a din ta a. Kum 1963 June Executive Committee chuan Sub-Committee chu dîng chhunzawm zêl tûra relin 1966 thleng a dîng chho nghe nghe. Kum 1966 chuan Account pawh a hrana vawng tûrin a rêl zui a.

Damdawi lama rawngbâwlina pawh tula hriat a nih avângin June 1963 khân Rotlang (W) Tuikuk zinga thawk turin Nurse Lianzami chu tîr a ni a. Kum 1964 khan amah thlâk tûrin Nurse Vanlalnghaki tîr thlak leh a ni. Ramthim rawngbâwlinaah hian Education,

Direct Evangelism leh Medical lam hmangin thuang thuma rawngbâwl a ni.

Pastor bial hrang hrang atangin ramthim lam ngaihtuahtu bik Committee din tûlzia sawi a nih avângin June 17-18, 1966 Executive Committee chuan “Zoram Baptist Mission” (ZBM) chu a din ta a ni. Tunah chuan, ramthim rawngbâwl na lam enkawltu Department hming atân 2021 Planning Commission rawtna in ‘Mission Department’ tih a lo ni ta a ni. Thlarau bote hnêna rawngbâwl hna hi Kohhran din chhan pawimawh ber a nih avângin, Kohhranhote ah thlarau bo veina lo lian zêl rawh se.

Mission Sunday tobul: Assembly rorelnain ramthim lam ngaihtuahtu bik Committee a siam hma pawh hian Pastor bial thenkhat, Phawngpui bial leh Tuithumhnâr bialte chuan Matupui / Kampelet te, Mire ramte bei tûrin an bial huapa Committee dinin thuhrlute an tîr a, Ringtu siamin an bial Kohhranin an harh phah hle a ni.

Kohhranhoten ramthim veina kan lo neih theih nân 1951 leh 1952 khân Tirhkoh pahni a inkawpin Kohhran hrang hrang a tlawh kual tir a, hei hian Kohhrante tiharhin Ramthim veina a neihtir nasa hle a ni. Tichuan vawiin thlengin he ni hi kan lo hmang chhunzawm ta zêl a ni.

ṬHALAI KRISTIAN PAWL NI

(ṬKP DAY)

(July 30)

ṬKP Tobul & ṬKP Day: Kohhrana thalaite Ṭpuala rawngbawl na huang hran siam tura uluk leh fimkhur taka an ngaihtuah hnuah July 30, 1951 khân Serkawn-a thalai rualte leh Kohhran upate chuan kan Zosâp missionary-te kaihhruaina hnuaiah Ṭhalai Kristian Pawl hi an lo din a. Hruaitu hmasa te chu: President – Pu Lungruala; Vice President – Pu Vanlalkunga; General Secretary – Pu K. Lalliana; Treasurer – Pu T. Ropianga; Senior Adviser – 1) Rev.H.S.Luaia; 2) Upa.C.Saizawna; 3) Zomawia Nu (Mrs. FJ.Raper) 4) Pu Lalmama te an ni. Executive Committee members NI. Roṭhuami, Pu Hrangthanga, Pu Lalsawma, Pu Remkunga leh Pu Thanghmuna te an ni. Ṭhalai Pawl din hi Presbytery (tunah Assembly)-

in a lo phalsak tawh avângin 1952 Presbytery Inkhâwmpui (Pukpui) chuan Ṭhalai Kristian Pawl lo ding ta chu a pawmpui nghâl a. ṬKP hi Presbytery hian Biala din phalna a pek nghâl bawk avângin bial hrang hrangah pawh ṬKP hi din nghâl a ni.

Hetih lai hian Mizoram hi Assam state chhônga district pakhat mai a nih avângin ṬKP inkhaikhâwmna pawh District ṬKP tih a ni a. District ṬKP Inkhâwmpui hmasa ber pawh 1955 khân Pûkpui-ah neih a ni. Hun rei tak chhông chu ṬKP Day atân hian District ṬKP Inkhâwmpui hmasa bera (1955) a ni hmasa zâwk, October 22 chu hman a ni ṭhîn a. Amaherawhchu he ni hi dik tawk lova hriatna a awm avângin MṬKP Rorelna chuan vawi hnih/thum lai a ngaihtuah hnuin 1995 MṬKP Rorelna (Sethlun) chuan Kohhran hruaitute leh kan missionary-te kaihhruaina hnuaia Serkawna ṬKP an din ni, July 30 hi ṬKP Day-ah hman ni tawh se a ti a, chu chu BCM General Committee pawhin pawmpuiin 1997 atângin ṬKP Day hi July 30-ah hman a lo ni ta a ni.

ṬKP rawngbâwlina tlangpuite:

- 1. Mission:** ṬKP hian a din tirh atângin thlarau bo veina lian tak neiin, District ṬKP Inkhâwmpui hmasa ber 1955-a Pukpuia neihah pawh Agenda “ṬKP hminga Thuhriltu tirh” tih ngaihtuah nghal a ni a. Tûn thleng hian ṬKP te hian theih tawkin hma kan la la ve zêl a ni. Mission Support hi Bial leh Unit ṭhahnemngaiten an pe zêl a, Mission Support pe hi an la pung zêl a ni. MṬKP hian missionary damlo leh ṭanpui ngaite ṭanpui nan Mission Relief a sem ve ṭhîn bawk a. Hêng bakah hian MṬKP, bial leh unit ten mission lama hma kan sâwn theih nân thuzir tûrte buatsaihin, mission consultation te neiin, work camp leh mission visit te neih ṭhîn a ni bawk.
- 2. Kohhran leh ṬKP:** ‘Krista leh Kohhran tân’ ti-a thupui kan dah angin ṬKP hian kohhran tana ṭangkai thei ang bera awm hi a tum fo ṭhîn. BCM project hrang hrang te chu MṬKP chuan ṭhalaite project-ah pawmin a hlawhtlin theih nan theihtawp a chhuah ṭhîn a. Tûn hnai maiah pawh AICS leh HATIM tan te, Christian Hospital Lawngtlai leh

Serkawn tân te, Nauhnuhham (BCO) enkawlina atân te pawisa faia a tanpui bâkah hnatlâng leh thil dangtein a tanpui thîn.

3. Khawtlâng thatna tura hmalak: T̄KP hian khawtlâng thatna tûrin kawng hrang hrangin hma a la thîn a. Zirna lam te, khawtlâng fai leh thianghlîmna thu te, environment humhalh thu te, zu leh ruihhlo do chungchâng te, HIV/AIDS chungchanga inzîrtirna te, a thlawna thisen pek chungchangah te hma a la thîn a. Kristian chhungkaw din chungchâng te, ngaihhlut tur dik inzîrtirna te, intodelh tûra inzîrtirna te pawh neih a ni. Hêng hmalakna hrang hrangah hian sawrkâr leh tlawmngai pawl hrang hrangte bâkah Kohhran pawl dang thalaite nen pawh hmalakho thîn a ni.

4. Thalai Pawl dangte nena thawhhona: District T̄KP inkhâwmpui hmasa ber (1955) chuan Kohhran pawl dang thalaite nena thawhhona leh ram pawn thleng pawha huang zauh a tul thu a lo ngaihtuah tawh a. Vawiin thlengin T̄KP te hian Mizoram chhûngah leh kan state thenawmah te

leh hmun hla zawk thleng pawhin palaina leh rawngbawlina a la nei zêl a ni. North East India Christian Council Youth Assembly (NEICC-YA)-ah a hnarkaitute zinga mi kan ni a, Baptist Youth Fellowship India-ah pawh chanvo pawimawh tak tak changin, BYFI Inkhâwmpui 2015 pawh Serkawnah kan dâwl. National Council of Churches in India Commission on Youth (NCCI CoY)-ah te pawh kan tel ve ta a. Asia Pacific Baptist Youth Fellowship leh Baptist Youth World Conference-ah te pawh zaipawl leh palai kan intir ve reng thîn a ni.

5. Thalai Entu: T̄KP ten ziaka rawngbâwlina hlu tak kan neih Thalai Entu hi 1978 ațanga chhuah tan a ni a. Thalai Entu hi Pathian thua infuih thar nân te, chanchin inhriat tawn nân te, rawngbâwlina report tarlan nân te leh thalaite tâna thu bengvarthlâk tak tak inhrih hriat nân te hman a ni thîn a. T̄KP te rawngbâwlina pawimawh tak a ni. Pathian malsâwmna leh thawktute thahnemngaihna azarah kan sem chhuah zât pawh a pung nasa ve hle a ni.

ṬKP Day hman dân tlangpuite:

- 1) ṬKP Day hi kohhran leh khawtlângin kan hlawkpui theih nân hman ṭhîn a ni. Social Service neih ngei tum ṭheuh ila.
- 2) Kohhran member tam zâwkin min telpui theih nân uar takin sawm ila, a theih chuan Fellowship dangte (BKHP, BMP, KNP) pawh chanvo siamsak ve ni se.
- 3) Thawhlawm lâkkhawm a ni ang a, bial kal tlangin MṬKP-ah chhûn luh tûr a ni.

NEICC DAY OF PRAYER (October Pathianni vawi thumna)

North East India Christian Council hi November 23, 1937-ah Assam Christian Council (ACC) hming pua din a ni. Kum 1962 khân tûna a hming North East India Christian Council hian thlâk a ni.

A thiltum: A tum ber chu Kohhran inpumkhatna leh inunanauna ṭha siam a ni. A ṭul huna ram rorelna leh sawrkâr hmaah pawh hmârchhak Kristiante aiawha din a ni.

Tuna member zât: Member ni tûr hian kohhran member 5000 tal an nih a ngai a. Tûnah hian NEICC hnuaiah Kohhran pawl hrang hrang leh Para Church etc. 55 kan awm mêk a. Hetah hian member Church (Full member) 37 leh Para-Church etc aṭangin Associate member 18 an awm a ni.

A ruangâm: Kum khat danah inkhâwmpui rorel neih ziah a ni. Rorel thutlukna chu Executive Committee in a umzui thîn. Executive Committee-ah hian Kohhran member tinin aiawh pakhat theuh an nei.

NEICC Office Bearers: President, Vice President pahnih leh Treasurer te hi kum hnih atân zel inkhâwmpuiin a thlang a, Secretary erawh chu full time a nih avângin kum 4 atân thlan a ni. NEICC hian Standing Committee paruk a nei a, hetiangin:

- 1) Christian Home and Stewardship Commttee
- 2) Theological Education Committee
- 3) Mission and Evangelism Committee
- 4) Peace and Justice Committee
- 5) Church Union Committee
- 6) Land and Property Committee, te an ni.

Hmarchhak pum huapin NEICC thlazâr hnuaiah hian NEICC Youth Assembly (Ṭhalai pawl) leh NEICC Women Assembly (Hmeichhe pawl) lian tak, Office Bearers hrang, Inkhâwmpui hrang neiin an awm bawk.

NEICC Project: Kum 1952 khân NEICC hian Union Christian College (UCC) a din a, vawiin thlengin tluang takin a la kal zêl a ni.

NEICC thiltih thinte: Kristiante leh kohhran inpumkhatna a thil tum a nih ang takin NEICC hian inpumkhatna (Church Union) te, ramchhûngah leh Mission field-ah inunauna leh thawhona ṭha zawk dapin Seminar, Consultation etc. vawi tam tak a lo buatsaih tawh thîn. Chi bing inbeihna te, inthliarna kârah te, thisen chhuahna karah te, remna zawngin bân a phar thîn. Protestants leh Roman Catholic kârah thawhhona huang siam tûrin hma a la mek bawk. Chhiatna râpthlâk tuartute ṭanpui nân Relief fund pein, a hmunah ngei an harsatna a enpui thîn a, sawrkârah pawh a thlen bawk thîn. Khawtlânga sualna lo pung zêl sawihona leh a tihrehna kawnga ṭan lâk dân dapin programme a siam thîn bawk. Kohhran hrang hrangte inunauna tûrin intawhkhâwmna leh thil tihhona hun a buatsaih bawk thîn.

NEICC Day of Prayer: Kum 1975-a NEICC Inkhawmpui, All Saints' Cathedral, Shillong-a Church

of North India in a dawl tumin NEICC Day of Prayer neih hi pass a ni a. A tirah chuan November Pathianni vawi 3-na hman thîn a ni. Kum 1994 NEICC Inkhawmpui, Chandmari Presbyterian Kohhran, Aizawlin a dawl tumin kum tin October Pathianni vawi 3-naah NEICC member Kohhran tinte'n hman thîn tûrin a lo siam tha ta a ni. Hemi nia thawhlawm pawh NEICC inrelbâwlina atân pêk theuh thîn a ni.

NEICC Office: NEICC Secretary hovin NEICC Building tha tak neiin Shillongah Headquarters Office neiin an bung thîn a. Secretary hi NEICC member church te atangin an inthawh chhawk thîn a. BCM pawhin kan pastor pahnih (Rev. C. Sapruala leh Rev. R. Lalnunzira) te kan thawh ve tawh a ni. Chubâkah chuan Committee peng hrang hrangah te awm vein President te pawh BCM atangin an lo ni tawh thin a, Women Secretary te pawh kan Kohhran atangin kan thawh ve tawh bawk.

KHAWVEL SUNDAY SCHOOL NI (November Pathianni hmasa ber)

Khawvêla Sunday School lo inñan dân: Sunday School hi kum 1780-ah khân England rama Gloucester-ah Robert Raikes-an a din hmasa ber a. Hei hi lo thang lian zêlin Sunday School a lo pung chho ta a. Kum 1785 khân Kohhran hrang hranga Sunday School chu inzawm khâwmin pâwl hmasa ber, Society for Promoting Sunday School a lo ding a. Chumi hnu lawkah chuan Sunday School Society tia thlâk a lo ni leh ta a ni.

India rama Sunday School lo inñan dân: Khawvel hmun hrang hranga Sunday School rawngbâwlina a lo darh zau zêl hnu chuan missionary, ram danga kal chhuakte pawhin Sunday School hi Chanchin Tha hrilhna hmun pawimawh berah an neih ta zêl a.

India ramah pawh kum 1800 khân Baptist missionary Wiliam Carey-a te thianzaho khân Sunday School an lo din ve leh ta a ni.

Mizorama Sunday School lo inñan dân: January 11, 1894-ah Mizoramah missionary hmasa ber Sâp Upa leh Pu Buanga an lo thleng a. Anni pawhin Sunday School ngai pawimawhin kum 1896-ah Aizâwl-ah ngei Sunday School chu an lo din ve ta a. Chu chu BCM-in kan rama Sunday School hmasa berah kan pawm a. Mizoram chhim lamah chuan kum 1902-ah Tv. Thankunga (a hnua Tirkoh leh Pastor lo ni ta) chuan Sethlun-ah Sunday School chu a din ve leh ta a ni.

Khawvêl Sunday School Ni: Khawvêl Sunday School Ni dintu chu Dr. George W. Bailey a ni a. Ani hi America (USA) mi niin, khawvêl puma Sunday School rawngbâwl-naa mi pawimawh tak a ni. Kum 1907 khân ama huaihawtin khawvêl pum huap Sunday School Ni, Rome khawpuiah an lo hmang tawh a. Kum 1910 khân World Sunday School Association-ah

President atân thlan a ni a. Chumi kum May 22 chuan Washington khawpuiah khawvêl Sunday School Ni hi ropui takin an hmang a. Tunah chuan khawvêl hmun hrang hrangah Sunday School Ni hi kan hmang ta hlawm a ni. India ramah chuan November Pathianni hmasa ber hi khawvêl Sunday School Ni atân kan hmang a. Mizoram Baptist Kohhran hian kum 1939 khân All India Sunday School Union kan zawm a. Chumi hnu chuan Christian Education on Evangelical Fellowship of India (CEEFI) zawmin, kum 2009 atang khân All India Sunday School Association kan zawm ve a. Tichuan, tûn thlengin khawvêl Sunday School Ni hi India ram hmun danga mite rualin kan hmang ve ta zêl a ni.

Sunday School pawimawhna: Sunday School hian Kohhranah pawimawhna a nei lian hle a. Kohhran a din tawh chuan Sunday School hi a ding nghal zêl tawh a. Kum 1904-a Sethlun-a Kohhran inkhâwmpuiah chuan, “Kohhran din tawhnaah chuan Sunday School hi awm zêl rawh se” tih an lo rêl tawh a. Tûnah pawh hian biak in kan sak rualin Sunday School Hall pawh

kan ngaihtuahnaah a lang nghâl mai thin. Rev. Dr. V. Lalzawnga'n Sunday School pawimawhna a sawi ðhinah chuan, "Sunday School hi Mizote thiamna min petu, Kohhran dinhmun tinghetu, Kohhran ban a ni" a ti ðhin a. Tûnah pawh hian kan Sunday School thupui ber chu "Zir la, Nunpui rawh" tih a ni.

BWA HMEICHHE ðAWNGðAI RUAL NI (November Thawhðanni hmasa ber)

Khawvêl pum huap Baptist Kohhran Hmeichhe Pawl (BWA) hian kum tinin November chawlhkâr hmasa ber Thawhðanni hi ðawngðairual ni atân a ruat a. Kum tinin ðawngðai programme hi hman a ni ðhin. Khawmualpui hrang hranga ram hrang hrangte tân an ðawngðai ðhin a, a hluin a pawimawh takzet a ni.

BWA dinhmun: Khawvel Baptist Hmeichhe Pawl hi khawmualpui 7-a ram 128 aţangin member Kohhran 246 kan awm mêk a. Hêng ram hrang hrang aţanga member Kohhran 246-te lungrual taka thupui thuhmun hmanga kan ðawngðai ðhinna hian nasa takin Pathian ram a tinghetin a tizau ngei ang. BWA-ah

hian Tualchhông Kohhran 176,000 vel leh Kohhran member baptisma chang chin pawh 51,000,000 chûang kan awm.

A lo inñan dân: He ni lo chhuah ãanna chu kum 1948 khan Women's Committee of the Baptist World Alliance Chairperson Mrs. Olive Martin-i huaihawtin London khawpuiah, ram hrang hrang 9 ațanga kalkhâwm Baptist hmeichhia 19-ten ãawngțaihona an nei a. Khawvel indopui 2-na zawh hlim, mi tam takin harsatna nasa tak an tawh laite a ni baw k a; chutia rilru inhmu tâng taka Pathian hmaa an han kûnho chu nuam an tiin thlamuanna nasa tak an lo nei ta a. A hnu ni thum lekah European Baptist Women's Union a lo ding ta a. Chu pawl hmalakna chuan Baptist hmeichhiate tawngtai ni siamin, November chawlhkâr hmasa bera hun remchângah an kal khâwm ta ãîn a ni.

Tichuan, kum 1950-ah Baptist Women's Day of Prayer chu din a lo ni ve leh ta a. Chu chuan khawvêl huapin ni thuhmunah, thupui thuhmun hmanga

ãawngtaina ni a rawn her chhuahpui ta a. He ni hi ãawngtai nân ngawr ngawra hmang lovin, thupui leh programme pawh khawmualpui hrang hranga mite'n insiam chhâwkin, testimony ropui leh ngaihnawm tak tak te, sermon leh Bible study hlawk thlâk tak takte zir leh ngaihthlâk hona hunah an hmang ta ãîn a ni. Vawiinah hian MBKHP member zawng zawngte pawh kan unau khawvel hmun danga mite hun hman lo ãawmpui ve tûrin ãahnemngai takin kan insawm a ni.

NAUPANGTE NI (November Pathianni vawi thumna)

Inkaihhruaina fel tak neiin Mizoram Baptist Kohhran chuan Kristian Naupang Pawl (KNP) a enkawl a. Naupangte thlarau lama an puitlin chhoh zêlna tûr bakah nunphung (manner) an hriat theihna tûrin programme chi hrang hrang, inkhâwm leh thuzirte a siamsak thîn a ni. Vawiin ang, BCM ni pawimawh pakhat ‘Naupangte Ni’ hi ‘KNP Day’ nên ngaih pawlh loh ni se a tha ang.

Naupangte Ni chungchâng: Kum 2015 Assembly-in kan tunlai khawvêl sualna pung zêl thlirin, naupangte ngaihsak lehzual tha a ti a. Tichuan, Naupangte Ni hi kum tin Pathianni zing inkhâwm vawi khat hman thîn nise, tiin a rel a. Kum tin November Pathianni vawi thumna (3) apianga hman thîn nise tiin Assembly

Executive Committee 2015 (August) chuan a lo rêl fel ta a ni. KNP Day-ah hi chuan KNP ten tha an tih angin programme an siam thîn a, Naupangte Ni-ah erawh hi chuan Kohhran pum huapa naupangte pawimawhna inzirtîrna hun a tân hman tûr a ni. Naupangte pawhin chanvo a tam thei ang ber nei tûra hun pek thiam ni se a tha. Naupangte pawimawhna India sawrkâr chuan November 14 hi Naupangte Ni (Children’s Day) ah a puang a. He ni hi India ram Prime Minister hmasa ber Pandit Jawaharlal Nehru, naupangte ngaihsak êm êmtu pian ni a ni. Khawvel huap pawhin naupangte pual ni pawimawh tak tak, International Children’s Day, World Childen’s Day leh Universal Children’s Day tihte a awm a. Hêng niahte hian naupangte pawimawhna, zirtîr leh enkawl an tûlna te, an tih ve tur leh an mawhphurhnate nasa takin an târlang thîn.

Ram leh hnam changkâng apiangin naupangte an ngai pawimawhin an ngaihsak an ti thîn. Hei hi kan Bible zirtirnaah pawh a dik a ni, “Naupang chu a kalna awm kawngah chuan zirtîr ula, A upat hun

pawhin a thlah lo vang” tiin a sawi (Thufingte 22:6). Kan tu leh fate kaihhruai an awlsam lai leh enkawl an nawm laia ngaihthah hi thil pawl tak a ni a. A tuartu chu ram, Kohhran leh chhûngkua a ni thîn. BCM Assembly-in naupangte kan ngaih pawimawhna hre renga ‘Naupangte Ni’ a ruat hi a lawmawm hle a ni. Tualchhûng Kohhran tina hemi nia thusawitu apiangten kan rorêlna sâng ber duh dân hre reing, ‘Naupangte Pawimawhna’ lam thuchah leh inzirtîrna atân hman theuh i tum ang u.

BIBLE SUNDAY **(December Pathianni wawi khatna)**

Bible Sunday hi Kristian ten kan thurin inngahna Bible kan neih avânga lâwmthu sawina ni atâna hman thîn a ni a. Amaherawhchu Mizoramah hian Bible Sunday hi Kohhran hrang hrang lungrual taka kan thawhhona Bible Society pualin kan hmang ta ber a. Hemi ni thawhlâwm pawh hi Kohhran awmna hmunin a hnaih ber Bible Society-ah thehluh a ni thîn. Kohhran pawl inthliarna awm lovin, hemi ni hian biak in tam takah Bible Society hruaitute feh chhuakin Bible Sunday chu Bible Society puala inkhâwm nân leh chutiang lam hawia thuchah sawina hun atân hman a ni a. Chu bakah Bible avânga lâwm thu kan sawi rualin he rawngbâwna lam hawia infuihna leh mi inpete hnena chawimawina Certificate leh lâwmman

inhlanna ni atân kan hmang ber a, a lâwmawmin mi tam takin kan hlut chho ta hle a ni.

Bible Society lo pian chhuah dân: Bible Society lo pian chhuah dân hi thui tak sawi tûr awm mah se, a tlângpui chauh sawi ila. Kum 1800 vel daihah khan fur khawchhe hnuaiah, Llanfihange khua aţangin hmeichhe naupang pakhat Mary Jones-i chu kum 9 a nih aţangin kum 15 mi a nih thlenga Bible leina tûr atâna a pawisa khawl chu kengin, mel 25 laia hla, Bala khuaah kea kalin Bible a han lei a. Bala khuaa Kohhran hruaitu pakhat Thomas Charles-an Mary Jones-in Pathian Thu a ngainatzia leh chumi avanga a thawhrim nasatzia chu a hmuh chuan Bible pawimawhna chuan a rilru a luah khat ta em em mai a. Tin, Welsh ramah mi nazawng tân Bible neih a harsatziate hriain, Bible chhutu pawl (Society) din a nih theih nân nasa takin hma a la ta nghâl a. Tichuan, March 7, 1804-ah chuan London-ah British and Foreign Bible Society (BFBS) chu din a ni a. Chu pawl hmang chuan khawvela Kohhran pawl hrang hranga

Kristiante tanhona azârah Bible chu sem chhuah theih a lo ni ta a ni.

Mizorama Bible Society lo indin dân: India ramah pawh Calcutta-ah February 21, 1811 khan Auxiliary din a ni a. 1956 November thla khan North East India pum pui huamin Assam Auxilary hawn a ni ve leh a. Assam Auxiliary hawnnaah hian Mizoram aţangin Rev. Dr. C.L. Hminga, Pu Mûka leh Rev. Zairema te an tel ve a ni. Mahni rama branch hawng ve tûra ngen an nih angin Mizoram aţanga kalte pawhin mahni kohhranah hma an la ve nghal a. Mizoram Baptist Kohhran Standing Committee (Jan 10, 1957) Agenda No. 6 naah Bible Society Branch din thu a ngaihtuah a. June 7, 1957 Executive Committee, Theiriata neih chuan Agenda No-5 naah Bible Society Branch hi din ni rawh se, tiin a rêl ta a. December 8, 1957-ah chutih laia Assam Auxiliary Secretary R.W. Phillip chuan Bible Society of India (BSI) Lunglei Branch chu Bazar veng biak inah a rawn hawng a. ***BSI Lunglei Branch-a hruaitu hmasate chu:*** President - Rev. H.W. Carter (Pu Kara), Secretary cum Treasurer -

Rev. C.L. Hminga. (Pi Reii (Mrs Raper) chu a hnuah Treasurer atân ruat a ni leh bawk). Hei hi Mizorama BSI Branch kan neih hmasak ber a ni. R.W. Phillip chuan a haw lamah December 11, 1957-ah Dawrpui biak inah Aizawl Branch a hawng ve leh a, October 1957 - October 1958 chhûnga hruaitu a tân President Rev. Liangkhaia; Secretary -Pu Mûka leh Treasurer-Pu Llyod-a te ruat lailawk an ni bawk.

Mizo ɥawnga Bible lehlin thu: England rama Leeds khua aɥangin mi hausa, missionary rilru Pu Robert Arthington-an ama sum senga a tirh missionary pahnih, F.W.Savidge (Sap Upa) leh J.H. Lorrain (Pu Buanga) te chu January 11, 1894 khân Mizoram an lo lût a. Anni pahnih hian Mizoramah Chanchin Țha meichher mit lova chhawm nun reng tûr chu lo chhiin, Chanchin Țha lungphum chu an rawn phûm ta a. Anni hian Mizo ɥawng ziaaka a awm theih nân A AW B an siam a. Chumi hnu chuan Mizote ziaak leh chhiar an zirtîr hnuin Bible lehlin tumin hma an la a. Tichuan, August 21, 1895 chawhnu lam chuan Bible lehlin hna chu an thawk ɥan ta a. Chutih hun laia

ringtu hmasate pawhin Mizo ɥawnga Bible lehlin hna an thawhnaah Sap missionary-te chu a ɥul dân ang angin an pui ve ȥhîn a ni. A tirah Chanchin Țha Luka ziaak an letling hmasa a; tichuan, Johana leh Tirhkohte Thiltih an letling leh a. August 31, 1897 khan Rev. D.E. Jones (Zosaphluia), Welsh Calvinist Methodist (Presbyterian) chu Wales ram aɥangin Aizawl a lo thleng ve a. D.E.Jones-a hian Sap Upa leh Pu Buanga leh pawh chu eng emaw chen a pui ve hman a. Sap Upa leh Pu Buanga kha a tirtu Arthingtona'n hmun pakhata rei tak an awm a remtih loh avângin an ramah a ko hawng leh rih a. An hna zawng zawng chu chhunzawm tûrin D.E. Jones (Zosaphluia) hnênah an hlan a. Tichuan, Sap rama an haw thlâk pahin Calcutta-a Bible Society hotute hnenah an Bible lehlin chu chhut atân an pe a. Calcutta-ah an chhut theih loh avângin Sap ramah an thawh thla a British and Foreign Bible Society; London chuan Luka leh Johana hi kum 1898-ah an lo chhu ta a, kum 1899-ah Tirhkohte Thiltih bu pawh chu chhut a ni ve leh ta a ni.

Bible lehlín hmasak te hming: An Bible lehlín bu hmasate chu hetiang hian a hmingah an dah a; Sâptawngin an dah nawn bawk a.

- 1) Chanchin ṭha Luka Ziak (The Gospel According to St. Luke in Lushai)
- 2) Chanchin ṭha Johana Ziak (The Gospel According to St. John in Lushai)
- 3) Tirkhohte Thiltih (The Acts of The Apostles in Lushai)
- 4) A Mizo ṭawng bu hming hnuaiah zêl hian a Saptawng bu hming hi an dah a ni

Mizoramah Mizo Bible: Bible lehlín a nih veleh Chanchin Ṭha Luka ziak bu chu kum 1899-ah Dak-in Calcutta atāngin a lo thleng a, Zosâphluia sawi dânin, hemi kum hian bu 150 chu hralh zawh ngâh a ni. Chumi hnu rei vak lovah chuan Johana leh Tirkhohte bu hnih pawh a lo thleng ve leh ngâh a. Kum 1903-ah Sap Upa leh Pu Buanga chu Mizoram chhim lamah Baptist missionary ni tûrin an lo lût leh a, Bible lehlín hna chu hmar lama Sap missionary-te

nen an thawkho ta zêl a. Kum 1908-ah Calcutta-ah bu 3000 an chhu leh nghal mai a. Bible pum pui chu September 6, 1959-ah Mission Veng biak in, Aizawl-ah tâlāngzarh a ni a, Mizo Kristianten Bible tak tak kan nei ve ta a ni.

Mi tín tân Bible: Ringtute tân Bible tel lo chuan awm thiam a harsa a, mi a hlim lai leh lungngaih ber lai pawhin Bible-a Pathian thu nung chuan nasa takin a nun a hruai ṭhîn a; chuvāngin ringtu mi mal tinin Bible hi kan thlarau nun min chāwmtu atân kan hmang ṭhîn. Chûvang chuan, Bible Sunday pawh hi Kohhranin ṭha taka hman kan duh a, he ni hi rilru leh tih tak zetin Bible pawimawhzia leh hlutzia ngaihtuah chung leh lâwmthu sawi chûngin hlâwk taka hmang ṭheuh tûrin kan insâwm a ni.

Bible sahsawm tumna: Tirkoh Vanchhûnga Chhakchhuak leh Liankhama chuan Pûkpuiah Luka ziak chu chhuang êm êm in khawlaiah an chhiar a, miten lehkhabu an hmuh ngai loh avāngin hmuh an chāk a, a bu chhûng thu an chhiar te chu mak leh

ngaihnawm ti êm êmin an ngaithla a, mi tam tak an pung khâwm hlawm a. Chu veleh an Rahsi (intilal thiam tak) Dârmaka chuan a ngaithiam lo va, thinrim zetin, “Nangni chu ka sât lo vang che u; in lehkhabu kha ka sût sawm vek dâwn,” tiin, Gurkhali chempui (khukri) chu a lek ta mai a. Tichuan, a sah tak tak hma chuan Vânnhônga chuan, “Lianphung, nang tlangvêl tha chak i ni a, he Bible hi tlanbopui rawh, min sahsawmsak zawngin aimit-thlawn ang mai kan ni dâwn si a,” tiin Lianphunga chu a tlanbopuitir ta a. Miin khaw tâwp thleng zakin an um a, an um phâk lo va, Bible chu a him ta a ni, an ti.

Chutih laia an lehlin dân tawngkam chu hetiang hi a ni. *“Ngai te Lalpa, ka sum zatve, pachhiate hnena ka pe ang: hmana tu hnena pawh thil eng paw hlep ru ila ahmun liin ka rul leh ang”* tih leh, *“Voiina he in ahian damna a lo thleng ta, ani poh Abrahama fapa a ni bok shi a. Boral apiang zonga chhan turin Mihring Fapa a lo kal a ni”* tih a ni. Miten dodâl nasa hle mah se, Bible thu hi Pathian thu nung a nih tlat avângin, mi tam takin an ngainain an duh êm êm tho a ni.

“I thu hriattirte chu kumkhuaa rochunah ka la a, ka thinlung tihlimtu a ni si a” (Sam 119:111).

Bible Society thiltum: Bible Society hian thiltum pathum a nei a, chúngte chu:

- 1) Mi tinte hnena pèk tûr a ni
- 2) Mi tinin an hriat theih tûr tawngin lehlin tûr a ni
- 3) Miten an lei theih tûr tawka man tlawma hralh tûr a n.

Vawiin Bible Sunday-ah hian Bible kan neih avângin Pathian hnênah lâwmthu sawi ila. Bible Sunday thawhlâwm hi Bial kaltlângin Bible Society-ah chhûn luh tûr a ni ang.

KRISMAS NI (December 25)

Kum tina Mizoram Baptist Kohhran Ni pawimawh kan hman hnuhnun ber chu Krismas ni hi a ni a. Vawiinah hian lei leh vana lal ber Pathian Fapa, min hmangaih avânga mihringa lo chang Isua Krista chibai bûk tûrin kan thinlung buatsaih ila, rinnain Bethlehem lam i hawi theuh ang u.

Krismas Ni hman tan a nih dân: Khawvel puma Kristiante tâna hun hlimawm leh kan nghahhlelh ber chu Krismas hi a ni awm e. Isua pian ni thua hian chhut dan hrang hrang a awm avângin kan hman hun pawh a inang vek lo va. A pian kum dik tak hi hriat chhuah a harsa hle a ni. A tira BC 1 leh AD 1 inkar ni tûra an chhut kha dik tâwk lova hriatna avângin ngun

taka ennawn leh niin, BC 4 leh 5 hi mi thiam tam berte dah dân a ni ta a ni.

Hmanlaiin khawthlâng Kohhran leh khawchhak Kohhranah Lal Isua pian hun dik nia an hriat dân a inang lo va. Mahse a tam ber Protestant leh Roman Catholic Kohhrante chuan December 25-ah hian kan hmang a ni. Krista lo pian ni tak hi hriat ni lo mah se, kum za bi 4-na aţangin Kohhranin Krismas ni hi an hmang tan a. Eng ni berah emaw chuan Lal Isua hi a piang ngei a, min tlan tûra Krista lo pianni hi lawm a phu êm êm a ni. A taka thil lo thleng ngei a nih avângin, eng ni ber emaw kan hman hi thil sual a ni hranpa lo.

A hlutna: Krismas hlutna chu mi sualte chhandamna tûra chung lam thilpêk khawvêlin a dawnna ni a nihna hi a ni. Tin, Pathian lawm zawng a ni ngei ang tih hriatna chu, hetiang taka ringtute thinlunga hmun a chang lian chho zel leh sawi hleih theih loh malsâwmna khawvêlin a dawnna huna a lo chang ta hi a ni. Khawvêl hmun tinah a tha lamin rah a chhuah

nasa a. Sumdawngte tan hun tha a ni a, ran talhtute tan hun tha a ni bawk a; chhungkua intawh khawmna hun tha a ni a. Thlarau lamah pawh malsawm kan dawnna hun tha a ni. Kan hnam zia leh khawsak phungte inang vek lovin, kan theih leh thiam zawngte inchen vek lo mah sela, Krismas hian mi dang tân hlimna a thlen a, thil tha intihsak tawwna boruak a keng tel a. Hei anga ni ropui leh hlimawm hi khawvêl pum huapah pawh sawi tân a awm chuang lo.